

# Powšitkowne WOZJEWJENJA

njedźelu, 10. februara 2013

## Hłowna a wólbna zhromadźizna TCM

Předsydstwo Towarstwa Cyrila a Metoda z.t. (TCM) přeprošuje wšitkich člonow towarstwa, člonow sekcijow a korporacijow kaž tež zajimowanych hosći na swoju hłownu wólbnu zhromadźiznu štwórtk, 14. februara, do Pančic-Kukowa. Započnjemy we 18.30 hodź. z Božej mšu w klóšterskej cyrkwi. Přizamknje so zhromadźizna we wosadnicy. Na njej wuzwoli so nowe předsydstwo. Sćěhowny dnjowy porjad je předwidźany:

1. zahajenje
2. wólbna nawody zhromadźizny
3. rozprawy předsydstwa, nawodow korporacijow a sekcijow
4. financna rozprawa
5. rozprawa rewizijneje komisije
6. schwalenje rozprawow
7. wuzwolenje wólbneje komisije
8. wólby noweho předsydstwa a rewizijneho wuběrka
9. diskusija
10. zakónčenje / modlitwa

*Jurij Špitank, předsyda TCM*

## Swjedźenska akademija TCM a Maćicy Serbskeje

Składnostnje 150. róčnicy založenja Towarstwa Cyrila a Metoda z.t. (TCM) a přenjeho wudača Katolskeho Posoła budže sobotu, 23. februara, w 14.30 hodź. swjatočne počesćenje serbskich wótcincow na Budyskim Mikławšku. Nyšporej, na kotrymž so rowy wótcincow žohnuja, přizamknje so swjedźenska akademija w Serbskim muzeju, na kotruž TCM a Maćica Serbska zhromadnje wšitkich swojich člonow a hosći wutrobnje přeprošujetej. Přeni přednošk w 15.45 hodź. (po swačini) změje šefredaktor Katolskeho Posoła, Bačoński farar Gerat Warnar, k 150lětnym stawiznam TCM a wuchadženja Katolskeho Posoła. Wuznamej TCM za katolsku cyrkej w Serbach kaž tež za serbsku narodnosć we Łužicy budže so Leňka Šoćić z Konstanca w swojim 20mjeńšinskim přednošku wěnować. Z diskusiju akademija wuklinči.

## Putnikowanje na Morawu

Wot štwórtka, 4. julija, hač do njedzele, 7. julija, planuje TCM putnikowanje wěriwych ze serbskich wosadow na Velehrad. W tychle dnjach spominaja tam na 1.150. róčnicu přichada swjateju Cyrila a Metoda na Morawu. Na swjatočnu Božu mšu 5. julija je tež bamž Benedikt XVI. přeprošeny. Nadrobniše informacije so hišće wozjewja. Štóž by zajim měł, na tutym putnikowanju na Morawu so wobdźelić, njech přizjewi so w redakciji Katolskeho Posoła, telefonowe čisło (0 35 91) 55 02 12.

## Zhromadny dzeń za 1. a 2. lětnik

Pod hesłom „Nowy spočatk“ přeprošuje Dekanatne dušepastyrstwo šulerki a šulerjow 1. a 2. lětnika sobotu, 16. februara, wot 9 do 15 hodź. na zhromadny dzeń do Don Boskoweho domu we Worklecach. Zajimcy njech so prošu hač do wutory, 12. februara, pod telefonowym čislom (03 57 96) 8 87 07 we Worklecach přizjewja. Za wudawki dnja zhromadźi so wot kóždého wobdźelnika přinošk we wysokosći třoch eurow.

## Swjaty mision w Radworju

„Wótče naš“ – žiwy byc a wěrić w počahach“ rěka tema swjateho misiona lětsa w Radworju. Tute dny wobnowjenja a pohłubšenja we wěrje budžeja wot srjedy, 20. februara, hač do njedźele, 3. měrca. Tež wěriwi z druhich wosadow su wutrobnje na swjaty mision w Radworskej wosadže přeprošeni. Konkretny přehlad je tutu njedźelu w Katolskim Posole wozjewjeny.

### Młodžina za křižom z Kukowskeho hrodzišća přez póstny čas

W póstnym času su młodostni lětsa přeprošeni so při křižu z Kukowskeho hrodzišća schadźować k modlenju a rozpominanju. Křiž bu lěta 1984 na Kukowskim hrodzišću postajeny a zwjazuje wot toho časa wosebje młodžinu ze zbóžnym martrarjom, kapłanom Alojsom. Po tym, zo křiž přez naše wosady scěhujemy, chcemy jón zaso na nasypje Kukowskeho hrodzišća postajić.

Naš póstny puć zahajimy w Ralbicach, hdžež so křiž tuchwilu česćuje. Zakónčić budžemy póstny puć z křižowym pućom dekanatneje młodžiny bołmončku w Chróscicach. Tam křiž nachwilnje wostanje, doniž jón na hrodzišćo njedonjesemy.

### Přehlad zarjadowanjow w póstnym času

**sobotu, 16. februara**, w 19.30 hodž., Ralbicy, nawjes

start a přewod křiža z awtami a motorskimi do Salowa, tu je w 20.00 hodž. komplet, po tym zetkanje w klubje

**sobotu, 23. februara**, w 19.30 hodž., Salow, kapałka

start a přewod křiža z awtami a motorskimi do Pěskec, tu je w 20.00 hodž. komplet

**sobotu, 2. měrca**, w 19.30 hodž., Pěskecy, kapałka

start a přewod křiža z awtami a motorskimi do Worklec, tu je w 20.00 hodž. komplet, po tym zetkanje w Don Boskowym domje

**sobotu, 9. měrca**, w 19.30 hodž., Worklec, kapałka

start a přewod křiža z awtami a motorskimi do Zdžěrje, tu je w 20.00 hodž. komplet

**sobotu, 16. měrca**, w 19.30 hodž., Zdžěr, cyrkej

start a přewod křiža z awtami a motorskimi do Dobrošic, tu je w 20.00 hodž. komplet, po tym modlenje před Najswjećišim

**sobotu, 23. měrca**, w 19.30 hodž., Dobrošicy, kapałka

start a přewod křiža z awtami a motorskimi do Chróscic, tu je w 20.00 hodž. komplet, po tym přiležnosť k swjatej spowědži

**njedźelu, 24. měrca**, w 14.00 hodž., Chróscicy – křižowy puć dekanatneje młodžiny

*Farar Měrcin Deleńk, dekanatny młodžinski dušepastyr*

### Zhromadne posćenje

Sonja Hrjehorjowa poskićuje tež lětsa w Sulšecach zhromadne dny posćenja. Přeni kurs – přewažnje němsce – započnje so wutoru, 26. februara, a skónči so pónđzelu, 4. měrca, z łamanjom posćenja.

Druhi kurs – přewažnje serbsce – budže wot srjedy, 6. měrca, hač do wutory, 12. měrca.

Naprašowanja a přizjewjenja su móžne hač do srjedy, 20. februara, pola Sonje Hrjehorjoweje, Sulšecy 42, 02997 Kulow, telefonowe čisło (03 57 25) 7 05 60.

### Pěši do Częstochowy

Tež lětsa pozbudža farar Beno Jakubaš, so w serbskej skupinje na putnikowanje z Waršawy do Częstochowy podać. Hić smě kóždy sobu, kotryž je 18. žiwjenske lěto docpěł. Termin putnikowanja je wot 5. do 15. awgusta. Zajimcy njech so bórže přizjewja pola fararja Bena Jakubaša w Njebjelčicach, telefonowe čisło (0 35 78) 30 20 05.